



UKA 2016/52  
01. oktober 2016  
Múte B. Egede

**Aatsitassarsiorfinni radiup qinngorneranik 60 ppm-inik akoqarnerusunik qalluiffiusuni aalajangersimasumik illoqarfinnut, nunaqarfinnut imeqarfinnullu tasernut 50 kilometerinik isumannaallisaanikkut killeqarfiliisoqarnissaanik Naalakkersuisut ataatsimut aalajangersagaliornissamik peqquneqarnissaannik Inatsisartuni aalajangiiffigisassatut siunnersuut. Siunnersuummut atatillugu inatsisiliornikkut suliassat pisariaqartut kingusinnerpaamik UKA2017-imi saqqummiunneqassapput.**

(Inatsisartunut ilaasortaq Aqqaluaq B. Egede, Inuit Ataqatigiit)

Takorlooruk Uummannap qaqaani, Ilulissani Sermermiuni, Sisimiuni Palasip qaqaani, Nuummi Quassussuarmi, Tasiilami Qaqortumilu Saqqaarsimmi aatsitassarsiortoqarnialersoq uranimik, flourimik aatsitassanillu qinngornernik ulorianartunik akoqangaatsiartumik. Illoqarfinnilu pineqartuni ulluinnarni inuunermut, asiartarnermut, nuniagiartarnermut, aalisarnermut, inuussutissarsiornermut avatangiisinullu innarliingaatsiarsinnaasumik.

Qujanartumik illoqarfinni qulaani taaneqartuni taamak pisoqaleraluttuanngilaq. Narsamili Kuannersuarni aatsitassarsiorfigineqarusuttumi taamak pisoqaraluttualerpoq. Ukiunimi kingullerni nunatsinni uranisiornissamat matu ikersineqarpoq matulu ikersereersimasoq nalunngilarput uranisiornissamat tulliani suneqarusunnersoq.

Tamatsinnit naluneqanngilaq nunatsinni innuttaasut akornanni politikikkullu sulinermi, nunatsinni uranisiorniarneq qanoq isumaqatigiinngiffiutigisoq.

Nunatsinni uranisiortoqarniarnera inuiaqatigiit annertuumik avissaartuuffigisaat unitsillugu ataatsimoorfigut isiginiarnerulerniartigit. Uranisiunngikkaluarlutami ataatsimoorfigisinnaasatsinnik ineriartortilluarsinnaasatsinnillu periarfissaqarpugut aningaasarsiorluarfigisinnaasatsinnik.

Tamatta suliffissanik aningaasarsiorfissanillu nutaanik pilersitsinissaq pioreersunillu inerisaanissaq ataatsimoorfigaarput. Uranisiorniarneq immaqa kisiat minillugu. Nukippasuit inuiaqatigiinni pitsaasumik atorsinnaagaluakkagut isumaqatigiinngissutitsinnut atorpagut. Ingerlariaqqittariaqalerpugut, nunatta tunniussinnaasai ataatsimoorfigisagut inerisassallugit piffissanngorpoq. Isumaqatigiinngissutigut ineriartornissamat aporfilersuisut qitiutikkunnaarlugit ataatsimoorfigut qitiutillugit nunarput inerisalerniartigu.

Inuit Ataqatigiit pingaartippaat nunatsinni aatsitassarsiornermi innuttaasut ataatsimoorfigisinnaasat aallaavigalugit nunatsinni inerisaassasugut. Pingaarluinnarportaaq inuussutissarsiutit maanna pioreersut, siuaatta pikkoriffigalugit namminneq ineriartortissimasaat aatsitassarsiulerniarnitsinni kalluarneqannginnissaat.

Nunami maani ineriartornermi, nunap inuii qitiutinneqartuartariaqarput inatsisitigullu immitsinnut tamakkiisumik illersornissarput qulakkeertariaqarparput. Isumaqarpugut nunatsinni aalajangersaanerit ilusilersorneqartartariaqartut inuiaqatigiinni pingaartitavut aallaavigalugit. Imminummi tunullugata avataaneersut uteriiserpasillutik aatsitassanut aalajangersimasunut piumanerannut nakkaanartariaqanngilagut. Nammineerluta nunarput, kingulissatta kinngornussassaat qanoq atorniarnarlutigu oqartussaaqataallutalu aaliangiisinnaasariaqarpugut.

Siunnersuut taamak isikkoqartillugu akuerisinnaangilarput. Taamaamat siunnersuummut imaattumik allannguutissatut siunnersuuteqarpugut:

**Kalaallit Nunaanni aatsitassanik radiup qinngorneranik akulinnik aatsitassarsiortoqarniartillugu inoqarfinni aatsitassarsiorfiginiarneqartup qanitaaniittuni innuttaasut taasitinneqaqqaartarnissaanik Naalakkersuisut ataatsimut aalajangersagaliornissaannik peqquneqassasut Inatsisartuni aalajangiiffigisassatut siunnersuut. Siunnersuummut atatillugu inatsisiliornikkut suliasat pisariaqartut kingusinnerpaamik UKA2017-imi saqqummiunneqassapput.**